

Formacion di Gobierno di Aruba:

Anuncio spera ta keda sin sosode

Proceso ainda den fase di negociacion

DIABIERNA 7 di februari ultimo, informadornan Mike Eman (AVP) y Gerlien Croes (Futuro) tabatin un audiencia cu Gobernador di Aruba, Su Excelencia Alfonso Boekhoudt. Aunke hopi hende den comunidad a spera cu e reunion aki lo a resulta den un anuncio formal di e gobierno nobo, incluyendo e reparticion di ministerio y nombracion di ministernan, e declaracion di e informadornan a mostra cu e proceso ta algun paso leu ainda di finalisacion.

Un proceso lento pero cuidadoso

Segun Gerlien Croes, e meta di e reunion tabata pa duna Gobernador un actualisacion amplio di e desaroyonan den e combersacionnan di formacion. El a enfatisa cu formacion di un gobierno nobo ta tuma tempo, debi na introduccion di un ley nobo relaciona cu “screening” y formacion di gabinete.

Sinembargo, a logra progreso: E partidonan a yega na un acuerdo basico y ta di acuerdo riba formacion di un coalicion. E combersacionnan a concentra riba e puntonan principal di e maneho, e reparticion di responsabilidad y e optimalisacion di ministerionan. Asina a acorda cu e siguiente gobierno lo consisti di shete minister, un decision tuma a base di consehonan di diferente instituto y e necesidad pa aumenta eficiencia den gobernacion.

“Aruba ta para dilanti retonan grandi, pero tambe oportunidadnan,” segun Croes. “Ta tempo pa un gabinete cu ta enfoca riba e necesidadnan economico y social di e poblacion.”

Reparticion di ministerionan ainda no definitivo

E detayenan tocante e reparticion exacto di e ministerio y e nombrenan di e ministernan no a wordo anuncia ainda. Segun Mike Eman, a inverti hopi tempo den crea un base fuerte di confiansa entre e partidonan. E confiansa aki ta crucial pa forma un coalicion stabiel y traha un programa di gobernacion efectivo.

“Nos a traha duro pa traduci e prioridadnan di ambos partido den un reparticion balansa di carteranan ministerial,” Eman a bisa. “Dentro di AVP, e discusion interno riba e reparticion di ministerionan ta andando ainda. Pero loke ta importante ta cu nos kier fiha e direccion di e gobierno rapidamente.”

Presion di comunidad

A pesar di e pasonan cu a wordo tuma, tin impaciencia den



comunidad. E siman cu a pasa tabatin hopi speculation cu lo bin un anuncio oficial di e formacion di gobierno, incluyendo e puestonan di minister. En cambio, a bira cla cu e proceso ta rekeri mas negociacion y “screening”.

E poblacion di Aruba ta enfrentando un caida significant den poder di compra y incertidumbre economico y hopi hende tabata spera un proceso mas lihe. Sinembargo, e partidonan ta enfatisa cu cautela ta primordial y cu e escogencianan cu ta wordo haci awor mester fortalece Aruba structuralmente den e añanan cu ta bin.

Kico awor?

Dia 18 di februari e informadornan lo bishita Gobernador atrobe pa discuti mas progreso. Mientras tanto, formadonan lo bay ta hibando combersacionnan cu stakeholders y ta elaborando mas riba e programa di gobernacion.

Entrante dialuna, consultanan ta cuminsa cu sindicatonan, organisacionnan di dunado di trabou y otro gruponan social. For di esaki mester sali un programa definitivo, cu no solamente ta ofrece e gobierno un plan di maneho, pero tambe ta recupera e confiansa di comunidad.

Aunke comunidad tabata spera contestanan definitivo, e mensahe di e formadonan ta keda cu ainda mester tin pasenshi. E siguiente simannan lo ta crucial pa finalisa e formacion di gobierno y e composicion real di e gabinete.